

·Sanjvwnz·



Byacwx Ndaw Da Gou

我眼中的大明山

□Danz Hjjvah/谭喜花

Gvangjsih Namzningz Si Vuj-mingz Gih miz goengq bya mizmingz ndeu heuhguh Byacwx.

Byacwx liz Namzningz miz 90 lai goengleix, bya raez miz saek 60 goengleix, gvangq miz saek 25 goengleix, lah daengz Sanglinz、Majsanh、Binhyangz caeuq Vujmingz 4 aen yienh gih.

Byacwx goengq byasoem ceiq sang heuhguh Byalungzdaeuz, sang miz 1760 mij, hix dwg Gveicunghnanz goengq bya ceiq sang. Gij va caeuq raemxgienghdat Byacwx gig okmingz.

Bi 2012 ndwencieng co’ngux dou bae youz Byacwx, seizde nit di, hix doek di fwn, daengx goengq bya heux rim mojlox. Miz roensuijniz daj laj bya hwnjbae daengz gwnz dingj, diuz roen van bae van dauq, miz-mbangj gvangq mizmbangj gaeb. Laj bya liz gwnz dingj gig gyaез, byaij 3 aen cungdaeuz cungj caengz daengz dingj, haici hwnjbae hix gig sinhoj.

Dou ngoenzde mbouj miz geij lai vunz bae youz, aiq dwg aenvih dienheiq mbouj ndei, seiqhenz cungj

dwg mojlox, dou naengh youq ndaw ci, yawj mbouj raen maz gingjsaek. Gyang roen nanz mbouj nanz raen miz ci doxroengz, gyoengqde aiq dwg haemhgonq youq gwnz dingj bya gvaq hwnz, seizneix ngamq roengz bya.

Gyang roen mizmbangj dieg ndei youz, dou couh dingz roengzdaeuj yawjyawj. Rumz gig hung, boq ndaej mbawfaex yiengjsasa, dou laihaeuz dwg raemxgienghdat dem.

Gwnz bya miz haujlai faex dijbauj raixcaix, mizmbangj gaenq laux, mizmbangj lij oiқ, moix go faex gwnzde cungj hoij miz gaiq baiz ndeu, gwnz baiz sij miz gij coh gofaex caeuq miz maz yungh.

Gwnz dingj miz diegyouq, hawj vunz youz baeg ndaej yietnaiq, caen fuengbienh. Dingjbya miz vunz cawj haeux gai, gij byaek dingzlai cungj dwg byaekcwх, gwn hwnjdaeuj gig diemz, gij byaek neix youq ndaw singz nanz gwn ndaej ne. Lij miz geij aen dan gai doxgaiq gwn, lumjbaenz noh saz、lwgmaenz、soemj、faengx iq caeuq lwgbiek daengjdaengj. Youq gwnz

dingj, cungj mbouj yungh you dungxiel mbouj miz huq gwn.

Gwnz dingjbya miz roen doeng daengz gak aen dieg lengj youz. Dou yaeк bae yawj raemxgienghdat. Raemxgienghdat liz dingjbya gig gyaе, gij roen dwg yungh rinbenj caep baenz, mizmbangj guh baenz mbaek-lae, mizmbangj cix gig lingqlangq, vunz daeuj youz hwnjhwnj roengz-roengz, yienznaeuz henz miz lanzgan, hoeng, youq gwnz yawj coh laj hix roxnyinh gig dwglau, itseiz ga fouz gyaеuj ngunh.

Bae yawj raemxgienghdat gyang roen hix miz haujlai gingjsaek gyaеundei. Gwnz bya faex gig lai, gij faex gaenq maj ndaej haujlai bi lo. Miz go faexge ndeu gaenq miz 200 lai bi lo, ndwn youq dingjbya, nyefaex raemhrwdrwd, yawj hwnjbae lumj aen liengj hung nei, youh lumj boux laux ndeu ndwn youq gizde.

Gwnz dingjbya miz va gig lai, dingzlai dwg va’ndokgengj. Bi daengz ndwen 4 ndwen 5, gij va gwnz bya couh doxciengj doxceng hai, gig

ndeiyawj, dingqnaeuz moix bi cungj youq Byacwx banh aen ciet va-ndokgengj, gij vunz daeuj yawj caenxndaet lumj moed nei.

Vunz naeuz gwnz Byacwx miz 108 giz raemxgienghdat, ndawde ceiq hung dwg Raemxgienghdat Rienglungz, roengzdaeuj dwg Raemxgienghdat Gvigim. Raemxgienghdat Gvigim liz gwnznamh miz 60 lai mij, gyang raemxmbog miz gaiq rin hung ndeu, yawj hwnjdaeuj lumj duzgvi nei, mboujlwnh youq henz raengz baih-lawz, cungj ndaej yawjraen gyaеuj “duzgvi” vix coh diuz roen wnq okbae, geizheih dangqmaz. Dou foenxfoenx youq gizneix ingj siengq guh geiqniemh.

Byacwx aenvih deihseiq labcab, dienheiq daegbied, doenghgo geq mbouj liux gangj mbouj caenh, bya miz goengq sang goengq daemq, doxca gig hung, ndigah seiq geiq gingjsaek mbouj doxdoengz, “seizcin va, seizhah raemxgienghdat, seizcou fwj, seizdoeng nae” coenz vah neix couhdwg gangj gij gingjsaek Byacwx.

Haenh Mbanjranz Gou

赞美我的家乡

□Vangz Cunhnonj / 黄春暖

Bi 1978 ndwen 12, dangjcunghyangh hainduj sizhingz cwngecwz gaijgwz hailangh, daengz bineix gaenq ndaej 40 bi lo. 40 bi neix daeuj, guek raeuz bienqvaq vaiqvwd, caiq mbouj raen gwn mbouj imq, daenj mbouj raeuj lo. Aeu mbanj dou daeuj lwnh, gij bienqvaq de gangj geij hwnz geij ngoenz cungj gangj mbouj liux.

Gou lij iq seiz, ndaw mbanj caengz miz roensuijniz. Haetromh, dou daj ranz byaij bae hagdangz, gwnz roen vunz byaij, duzvaiz byaij, duzmou duzgaeq dauqcawq buet, nyapnyaj dauqcawq vut, youh foenq youh uq. Baez daengz fwn doek, diuz roen naeznodnod, hoj byaij raixcaix. Aen gyausiz lij dwg ranzvax, seiz mbouj seiz lij roh fwn. Gyoengq hagseng sam seiq boux naengh aen daiz ndeu, doengzcaez yawj bonj saw ndeu. Seizhaenx vunz ndaw mbanj cienzbouh guh hongnaz, bouxboux cungj nyaengq, souhaeuj cix noix, ngamqngamq gaeuq gwndaenj.

Hoeng, seizneix danghnaeuz mwngz daeuj mbanjranz gou youz, couh raen bienqvaq daiq lai lo. Roensuijniz guh dwk mbanjmbanj doeng liux, lij miz boux-dajsauq ngoenzngoenz baujhoh, gwnz roen seuqsatsat. Gaijgwz hailangh le, guek raeuz gunghcangj lai lo, vunz ndaw mbanj

mizmbangj bae dajgoeng, hag ndaej gisuz ma le, caiq gag guh di seng’eiq. Gohyoз gisuz yied daeuj yied maenh, gyoengq-vunz dajndaem hix yied daeuj yied fungsou. Geij bi neix, haujlai vunz ndaem mak ndaem faex fatcaiz lo, bouxboux cungj hwnq ranzlaeuz, cang ndaej gyaеundei raixcaix! Lwgnyez hix mbouj caiq aenvih mbouj miz cienz mbouj ndaej doegsaw lo, bouxboux cungj naengh youq ndaw gyausiz hausaksak ronghsagsag, lij miz dohmizdij gyauyoз ne! Deng lo, danghnaeuz mwngz daeuj mbanjranz gou, mbouj lau mbouj miz giz youq, giz dou hai haujlai nungzgyahloз, ndaej bae yawj gij gingj gyaеundei lajmbanj, ep bya、gaeb bit、gaeb gaeq, ndaej cimz dwzcanj Bouxcuengh, hawj mwngz daeuj le mbouj siengj ma!

Mbanjranz gou bienqvaq daih, mbouj ndaej liz dangj raeuz dazyinx fueng-yiengq deng. Daegbied dwg gaijgwz hailangh le, raeuz engq yienh da raen ndeicawq lo. Gyoengq vunzlaux ciengz-seiz naemh lwglan naeuz: “Gietsim gaen dangj byaij, gaenx guh gaenx hag, mbouj loek!”

Mbanjranz gou caen ndei! Angqcoux mwngz ciengzseiz daeuj guhhek!

Mbouj Miz Youx Guenj Ra

没有对象尽管找

□Vangz Gozgvanh / 黄国观

Mbauq:

Mbouj miz youx guenj ra,
Mbouj miz baz guenj byaij,
Ngoenz daeuj nyangz youx gvai,
Ndaeж cwxcaih saeksauh.

Sau:

Mbouj miz youx guenj banh,
Mbouj miz gvan guenj byaij,
Ngoenz daeuj nyangz youx gvai,
Goj hai fwen daeuj doiq.

Mbauq:

Mbouj miz youx guenj ra,
Mbouj miz baz guenj banh,
Ndaeж boux baz naengzganq,
Gvaq ndaeж danq mbouj daengx.

Sau:

Mbouj miz youx guenj banh,
Mbouj miz gvan guenj daeuj,
Miz boux gvan gapgaeuq,
Bouxlawz daeuj neix youz.

Mbauq:

Mbouj miz youx guenj ra,
Mbouj miz baz guenj daeuj,
Miz boux baz cawj caeuz,
Mbouj aeu you saek yiengh.

Sau:

Mbouj miz youx guenj banh,
Mbouj miz gvan guenj daeuj,
Cij miz mbauq doxcaeuq,
Mbouj ndaeж yaeuh gou angq.

Mbauq:

Beix gou ra bouxyah,
Nuengx hix ra giz bae,
Song raeuz daeuj doengzcaez,
Ndaeж hawj gou hwnj lae?

Sau:

Nuengx muengh sam muengh seiq,
Muengh beix ndaeж gawq vah,
Ndaeж guh beix bouxyah,
Gvanbaz ndiep ciengxlwenx.